

# Kontuola

ANTZUOLA / Egubakoitza / 2002ko maiatzaren 24a / 114. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

## Astelehenetik aurrera EHNA eskatu ahal izango dugu herriko udaletxean

AINZANE IRIZAR

Maiatzaren 2ko osoko bilkuran onartu zuen Antzuolako Udalak Euskal Herriko Naziotasun Aitormena tramitatzea. Hartutako erabakia abian jarriko dute orain, eta datorren astelehenetik aurrera EHNA eskatzeko aukera izango dute antzuolarrek udaletxean.

Antzuolako Bai Euskal Herriari taldeak aurkeztutako mozioari baietza eman zion udalbatzarrak maiatzeko osoko bilkuran. Mozio horretan Udalak EHNA tramitatzea eskatzen zuen talde horrek.

Behin mozioa onartuta, datorren astelehenean, maiatzaren 27an, hasiko da Udala tramitazio lana egiten. Udalaren zeregina izango da herritarrei eskaera orriak eskaini eta Udalbiltzarekin bitartekari lanak egitea.

Udalbiltzak ekimen horrekin duen helburua da "euskaldunok geure naziotasuna aitortzea".

### EHNA EGITEKO BETEBEHARRAK

Nortasun-agiri neurriko hiru argazki eta errolda-agiria aurkeztu beharko dituzte udaletxean EHNA egin nahi dutenek. 12



Naziotasun Aitormenarekin batera, argazkikoa bezalako txartela bidaliko dute Udalbiltzatik.

euro ordaindu behar dira agiria- ren truke. 14 urtetik beherakoek familia liburuaren fotokopia ere aurkeztu beharko dute. Ezinduek, berriz, medikuaren ziurtagiria aurkeztu beharko dute.

Behin eskaera eginda, Udalbiltzari helaraziko dizkio Udalak eskaerok. Udalbiltzatik aitormena bera eta txartel txikiago bat bidaliko dituzte. Eskaerak udaletxeko idazkaritzan egin behar

dira, maiatzean, honako ordutegian: goizez, 08:30etik 13:00etara eta arratsaldean, 14:30etik 17:00etara. Ekainetik aurrera, berriz, 08:00etatik 15:00etara egongo da zabalik idazkaritza.

### ARGAZKI ERAKUSKETA

## Irakeko eta Senegalgo argazkien erakusketa egongo da asteburuan, Anelkarrek antolatuta

AINZANE IRIZAR

Gaur, egubakoitza, zabalduko dute argazki erakusketa, eta domekara arte egongo da ikusgai Olanar etxean. Irakeko eta Senegalgo argazkiak jarriko dituzte hantxe. Bide batez, Senegalera bidaltzeko arropak eta eskolarako materiala batuko dituzte.

Acción Verapaz gobernuz kanpoko erakundearekin harremanetan jarri ziren Anelkarreko kideak, eta horrelaxe ekarri dute

Irakeko argazkien erakusketa Antzuolara. Iaz, maiatzean, egon ziren Acción Verapazeko hainbat kide hantxe, Irakeko V. Kristau Konferentzian. Bidaia hura aprobetxatuz, irakiarren egoera gertutik bizi nahi izan zuten. Horretarako, hango domingotarrekin eta hainbat erakunderekin harremanak izan zituzten, baita asteburuan ikusi ahal izango ditugun argazkiak atera ere.

Erakusketa horrekin lotuta, atzo, eguna, hitzaldia egin zuen Acción Verapazeko kide Jose Antonio Lobok. Irak gaur: erru-

gabeen sufrimendua izenburupean egin zuen hitzaldi hori Lobok eguen arratsaldean. Horrela, Iraken ikusi eta entzundakoen gaineko esperientzia kontatu zuen Jose Antonio Lobok.

### SENEGALGO ARGAZKIAK ERE IKUSGAI

Iaz, Elkartasun Egunean batuta-ko diruarekin, Senegalgo Casamance herrirako generadore bat erosi zuten Anelkarrekoek. Euren esanetan, oso erantzun positiboa jaso zuten herritarrengandik. Orain, Iraken gaineko erakusketarekin batera, Casamancera

generadorea iritsi zen eguneko argazkiak jarriko dituzte Olanar etxean, herritarrek ikus dezaten zer egin zuten egun hartan batuta-ko diruarekin.

Bide batez, Casamancera bidaltzeko udako arropak, izarrak eta eskolako materiala jasotzeko mahaia jarriko dute Anelkarrekoek Olanaran bertan, erakusketaren egun eta ordutegi berarekin.

Bestalde, Bidezko Merkataritzako produktuak salgai jarriko dituzte Antzuolako Elkartasun Taldekoek oraingo asteburuan.

### LABUR

#### Bizi Testamentuen Udal Erregistroa zabalduko dute

Maiatzaren 31n jarriko du abian Udalak Bizi Testamentuen Udal Erregistroa. Horren oinarri ideologikoa da duintasunez hiltzeko eskubidea babestea. Horrela, gaixotasun larriren bat izatekotan bere nahia zein den azaldu ahal izango du edozein herritarrek idatzi baten bitartez.

Udalaren zeregina notario eta gordailuzainarena izango da; eskatzaileak aurkeztutako agiri idatziaren zainatzaile izango da, hortaz, Antzuolako Udala.

#### Musikari gazteen kontzertua maiatzaren 31n

Datorren asteko egubakoitzean, maiatzaren 31n, hain zuzen ere, herriko eta Bergarako musikari gazteek kontzertua eskainiko dute Errukizko Amaren parrokiari, 19:30eko mezaren ostean, 20:00ak aldera.

Batetik, Bergarako Orkestra Gaztea arituko zaigu; Usoa Toledo antzuolarrak biolina jotzen du orkestra horretan.

Eta gero, Bergarako Musika Eskolan ikasten dabiltzan Antzuolako 30 bat gaztetxok osatutako koroaren emanaldia izango dugu.

#### Antzuola-Donostia ibilaldia antolatu dute Arrolakoek

Datorren asteko zapatarrako (ekainak 1) antolatu dute Arrolakoek Antzuolatik Donostiarako ibilaldia.

Goizeko bostak aldera irtengo dira Antzuolatik. 13 bat orduko ibilaldia izango da, luzeegia askorendako. Horregatik, ibilaldiaren erdia egiteko aukera egongo da. Informazio gehiago Arrolakoek eurek emango dizuzte martitzenean, hilaren 28an, izena ematerakoan; 19:00etatik 20:00etara izango da hori.

# Jende ugari parte hartu zuen zapatuan San Isidroko azokan eta ospakizunetan

AINTZANE IRIZAR

Egubakoitzeko euri zaparradak ikusita, eskertzekoa izan zen zapatuan ateri egotea.

Horrek animatuta-edo, jende mordo batu zen plaza inguruan. Ganaduak, artisauek, bertsolariak... denetarik izan genuen zapatu goizean.

Eguerdia aldera, Kukumarro Lehiaketako eta Patxiko Txerren ipuingintzako sariak banatu zituzten. Kukumarro Lehiaketan Ascensio Laskurainen taldeak irabazi zuen erretiratuen mailan. Umeei dagokienez, denek irabazi zuten sariren bat, eta 12 urtetik gorakoen artean, Oier Peñagarikanoren taldeak irabazi zuen Kukumarro Lehiaketa.

Patxiko Txerren lehiaketan, berriz, zazpi sari banatu zituzten; hona hemen irabazleak: Garoa Manzidor, Aitor Kortabarria, Andoni Narbáez, Lide Toledo, Garazi Beitia, Miren Aranguren eta Andoni García. Saritutako ipuinak liburu baten batu dituzte eta mahi duenak liburutegian dauka eskuragarri. Gainerako parte hartzaileen ipuinak ere koadernatu egin dituzte eta liburutegian daude.

Sariak banatu ostean, bertsolarien txanda izan zen. Amets Arzallus eta Ainhoa Agirreazaldegi berriz, bertsoez gozatzeko aukera izan zuten plaza batu zirenek.



Eskulangileak, euren lanak saltzeaz gain, fin ibili ziren lanean.




Azokan egon ziren ganadu guztiak Antzuolako baserrietakoak ziren.



Umeak ere pozik ibili ziren, posturik postu.



Zazpi sari banatu zituzten Patxiko Txerren ipuingintzan.



Saio polita egin zuten Ainhoa eta Amets.



Ascensio Laskurain, Kukumarro Lehiaketako irabazleekin batera.



Oier Peñagarikanoren taldeak irabazi zuen Kukumarro Lehiaketako sarietako bat.

# HARIZKI

**MUEBLES IGEA**

Sukalderako eta bainurako altzariak  
Altzari rustikoetan  
espezializatuak

Zurrategi plaza 4, behea. ANTZUOLA. Tel. eta faxa 943 78 71 80



*Juan Cruz*  
ARGAZKIAK

Herriko plaza 4. Tel. 943 78 70 66. ANTZUOLA